


Mundo cultural den tristeza cu fayecimento di Leonardo Tromp



ORANJESTAD (AAN): Riba Diadomingo mainta a ricibi e tristo noticia cu Leonardo Tromp, mihor conoci como Leo a fayece.

Leo tabata un persona hopi activo den promocion y proteccion di e balornan cultural di Aruba. Leo tabata e persona cu a ocupa e puesto como prome director di Instituto ICA, cu ta Instituto di Cultura Aruba.

Pa check bek historia, Diadomingo 27 di april 2014, tabata tin un ceremonia historico y impresionante riba Plaza San Pedro na Vaticano. Pa prome biaha den historia dos Papa pontifice d.f.m., esta Papa Johannes XXIII (+1963) y Papa Juan Pablo II (+2005), akeda proclama Santo den e mesun ritual di canonisacion.

Tambe ta pa prome biaha cu un servicio similar ta ser atendi door di dos Papa, esta pa Benedictus XVI, e Papa anterior, como naturalmente tambe door di Papa Francisco, e Papa actual, kende pa dicho ocasion tambe a ofrece un celebracion eucaristico.

Pa e canonisacion

tabata tin como un miyon persona riba e plaza y tambe hopi hefe di estado tabata presente, p.e. e Rey y Reina di Spaña.

For di Aruba, Leo Tromp hunto cu su casa Ella Tromp-Yarzagaray (e tempo ey tabata Gobernador interino) a asisti na un audiencia di e Papa, como tambe na e ceremonia di canonisacion. Despues di e ceremonia a duna Papa Francisco man, unda e Papa a manda su bendicion pa e pueblo di Aruba.

Leonardo Tromp a nace na Aruba dia 5 di Juli 1943 pues tin 77 aña di edad. E tabata sufri di un malestar breve, pero tabata recuperando. Sinembargo su salud a empeora den fin di siman, y a hasta haya administracion di sacramento di Santa Oleo.

DIARIO ta manda palabra di condolencia na su señora esposa Ella Tromp-Yarzagaray, su yiunan Sergio, Sharissa, y Angelo, y dos nietanan, y demas famia y amigonan.

Den siguiente edicion lo bin cu mas detaye extra di e bida di Leonardo Tromp.

